

# TIMOR LESTE



*The Asia Foundation apoia dezvoltimentu demokrátiku no ekonómiku iha nasaun foin independente Timor-Leste*

Husi kedas tinan 1992 mai, The Asia Foundation hala'o ona kooperasaun ho instituisaun lokál sira iha Timor-Leste kona-ba dezvoltimentu konstitusionál no reforma legál, edukasaun, negósius estranjeirus, direitus umanus, no dezvoltimentu ba lideransa. Hafoin referendu 1999 ne'ebé lori Timor-Leste ba independénsia, The Asia Foundation hala'o edukasaun kompreensivu ba votante sira barbarak molok halao programa kona-ba eleisaun ba assembleia konstituente no eleisaun presidensial iha tinan 2001 no 2002. Atu hatan ba nesiedade ne'ebé mosu daudaun ba nasaun nia dezvoltimentu, oras ne'e daudaun Asia Foundation fó apoiu ba programa sira ne'ebé hametin lei no ordem, no mós funsaun no efetividade lejislatura nian ba reforma legál, hadiak direitu fetu nian, no hadiak abilidade atu jere konfliktu ho efetividade. The Asia Foundation servisu ho parseria hamutuk ho organizasaun governamental no la governamental xave sira iha nasaun laran tomak hodi hala'o programa sira ne'e.

## ASESU BA JUSTISA

Timor-Leste ne'ebé foin hetan independensia, hasoru dezaftu bo'ot atu garante asesu ba justisa ba nia sidadaun sira iha tempu ne'ebé nasaun haka'as a'an atu harii sistema governasaun efektivu. Programa Asia Foundation nian konsentra atu harii sistema judisial ida ne'ebé independente; estabese servisu legál kompetente no asesivel, no mós mekanismu rezolusaun disputa nian ne'ebé tau énfaze hodi hakbesik ba populasaun rural sira ne'ebé desfavoresidu liu; no aumenta sidadaun sira nia koñesimentu kona-ba justisa. The Asia Foundation apoia Programa Monitoramentu ba Sistema Judisial hodi hare'e tuir nafatin lalaok tribunál no prosesu judisial no produz relatóriu no rekomendasaun atu aumenta responsabilidade no transparénsia. Hamutuk ho Ministériu Justisa, The Asia Foundation apoia daudaun nasaun nia kampania pública kona-ba informasaun legál ba dala

uluk iha rai laran tomak. Programa ne'e uza programa rádio interativu, enkontru públiku iha área rural sira, no mós poster no broxura informativu atu eduka sidadaun sira kona-ba nasaun nia kadru legál ne'ebé dezvoltolve daudaun. Liu husi rede organizasaun servisu legál nian, Asia Foundation mos fó servisu legál tuir nia kbit hodi hare' ba sidadaun desfavoresidu sira ho énfaze partikular ba fetu sira nia direitu.

## DEZENVOLVIMENTSU KONSTITUSIONÁL NO LEJISLATIVU

Atu bele fó assisténsia ba Parlamentu hodi dezvoltolve lei sira ne'ebé efetivamente hatan ba nesiedade nasaun foun ida nian, The Asia Foundation mantein asesór rezidente ida ba Parlamentu. Asesór ne'e servisu hamutuk ho Membru Parlamentu no komisaun sira atu hadiak qualidade análise lejislativa no debate nian, aumenta kapasidade funsionáriu sira nian atu apoia prosesu lejislativu, no hadiak política no prosedimentu sira. The Asia Foundation apoia mos semináriu kona-ba análise lejislativa ba Membru Parlamentu atu aumenta sira nia kapasidade hodi analiza no dezvoltolve lejislasaun. Nu'udar formasaun ba Parlamentu, Asia Foundation fó uluk kedas assisténsia téknika ba Assembleia Konstituente atu halo esbosu konstituisaun nian liu husi asesór ba asuntu hanesan sidadania, liberdade espresaun no asosiasaun, no obrigasaun konstitusionál Presidente nian.

## JESTAUN BA KONFLITU

Maski seguransa iha fronteira estavel hela, maibé iha hela asuntu fronteira nian balu ne'ebé seidauk rezolve, divizaun ne'ebé boot ba beibeik entre área rural no urbana, no mos legadu violénsia nian. Rai ne'e prezisa mekanismu konstrutivu sira atu rezolve konfliktu hodi hamenus possibilidade ba violénsia atu akontese ne'ebé bele hamosu instabilidade ba



## TIMOR LESTE

The Asia Foundation halo programasaun iha Timor-Leste hori tinan 1992 no estabese eskritóriu ida iha tinan 2000.

The Asia Foundation fó assisténsia téknika atu ajuda dezvoltolve konstituisaun Timor-Leste nian, política no prosedimentu sira ba Parlamentu foun.

The Asia Foundation apoia assisténsia legál ba sidadaun desfavoresidu sira iha nasaun laran tomak, ho atensaun espesial ba fetu sira nia asesu ba justisa.

dezenvolvimentu ekonómiku no demokrátiku no limita progresu ba futuru. Iha fronteira ho Indonézia, Asia Foundation servisu hamutuk ho organizasaun lokál sira hanesan Fundasaun Fatu Sinai Oekusi (FFSO) no Fundasaun Dame no Demokrasia atu fó kbiit ba sidadaun sira iha distritu Oekusi no Kovalima – ne'ebé iha fronteira ho Indonézia – atu identifika solusaun ba dezafiu prátiiku ekonómiku, sosiál no seguransa nian ne'ebé mosu husi fatin ne'ebé sira hela ba. Sidadaun sira servisu hamutuk ho organizasaun omóloga Indonézia, Grupu Apoiu ba Repatriasaun Kefa (Kefa Repatriation Support Group) hodi hakerek rekomendasaun ba ukun-nain sira hosi nasaun rua ne'ebé apoia hotu prosesu diskusaun bilateral entre rai rua. The Asia Foundation servisu mos ho Gabinete Presidente nian atu apoia mediasaun ba konfliktu no dezenvolvimentu lideransa ba grupu arte marsiál sira iha rai laran. Ho membru besik 40,000, barak liu mak joven mane dezempregadu, rezolusaun pasífika ba konfliktu entre grupu desportivu juventude nian sira ne'e bele tulun atu prevene violénsia ne'ebé bele hada'et ba komunidadade sira besik.

### REFORMA BA POLÍTICA EKONÓMIKA

The Asia Foundation hala'ó hamutuk ho Timor Institute of Development Studies estudu ida ho parte tolu kona-ba komérsiu no investimentu. Estudu ida ne'e ezamina tiha padraun no obstákulu ba komérsiu ho Indonézia, no fó análise komparativa ida kona-ba kustu manufatura ho orientasaun ba esportasaun iha Timor-Leste no Indonézia atu identifika difikuldade sira ne'ebé kriticu liu ba aumentu iha investimentu. Estudu ne'e analiza mos situasaun atuál kona-ba setór mobiliáriu doméstiku no kompetisaun hosi produtór estranjeiru sira. Estudu sira ne'e hamosu dadus bázikus nesesáriu kona-ba padraun no volume komérsiu nian iha Timor-Leste ne'ebé sei uza ba programa seluk tan.

### KAPASITASAUN BA FETO

The Asia Foundation apoia partisipasaun ativa fetu sira nian sira iha aspetu hotu-hotu dezenvolvimentu Timor-Leste nian. The Asia Foundation servisu hamutuk ho Gabinete ba Promosaun Igualdade atu hadiak abilidade konsellu suku sira nian atu aumenta ema nia konxiénsia kona-ba violénsia

hasoru fetu, no atu estabelese mekanismu komunitáriu atu hamenus violénsia. The Asia Foundation apoia mos organizasaun asisténsia legál nian sira hodi nune'e fó advokasia legál asesivel ba fetu no garante katak sira hetan tratamentu hanesan tuir lei. Fetu sira iha Timor-Leste dala barak laran todan atu buka konsellu legál tanba ladún iha fetu advogada. Ne'e duni, Asia Foundation tulun edukasaun legál ba fetu estudante direitu nain rua ne'ebé hetan interruptsaun ba sira nia estudu tanba violénsia hafoin referendu 1999 ba independénsia Timor-Leste nian. Hafoin remata tiha sira nia estudu, sira fila hikas mai Timor-Leste atu fó servisu legál ba fetu desfavoresida sira.

### RELASAUN INTERNASIONAL

Atu bele fó asisténsia ba dezenvolvimentu kapasidade negósios estranjeirus nasaun nian, Asia Foundation hala'ó ona servisu hamutuk ho Ministériu Negósios Estranjeirus no Kooperasaun hori tinan 2001. The Asia Foundation apoia ona formasaun diplomátika ba diplomata foun nain 10 iha rai Amérika hodi tuir programa esepiál ida kona-ba oinsá halo polítika iha kontestu demokrátiku. The Asia Foundation fó mos kontribuisaun ba dezenvolvimentu polítika kona-ba rekrutamentu, formasaun, no avaliasaun ba ministériu nia funsionáriu no diplomata sira, no mos dezenvolvimentu ba ministériu nia biblioteka. The Asia Foundation apoia programa diplomasia no polítika públika iha Universidade Nasionál Timor-Leste hodi haklean joven Timor sira nia esperiénsia kona-ba negósios estranjeirus. Programa ne'e inklui série semináriu regulár ba estudante no fakuldade, asesu ba internet, no koleasaun materiál esepiál ba biblioteka universidade nian.

*The Asia Foundation agradese apoiu kontínuu ne'ebé Ajénsia ba Dezenvolvimentu Internasionál Estadus Unidus (USAID) nian fó ba ami nia programa iha Timor-Leste.*

*The Asia Foundation nu'udar organizasaun la governamental privada, la lukrativu ne'ebé servisu atu lori ba oin interese mútuu iha Estadus Unidus no rejisaun Ázia-Pasífiku. Nia hetan finansiamentu liuhosi kontribuisaun hosi korporasaun, fundasaun, ema individuu sira iha Estadus Unidus, Europa no Ázia, no mós simu doasaun anuál busi Kongresu Estadus Unidus nian. Liu husi ninia programa sira, The Asia Foundation hametin lideransa, hadiak polítika, no hametin instituisaun sira hodi promote abertura no fahe prosperidadi iha rejiaun Ázia-Pasífiku.*



**HEADQUARTERS**  
465 California Street,  
9th Floor  
San Francisco, CA 94104 USA  
Tel: (415) 982-4640  
Fax: (415) 392-8863  
info@asiafound.org

**WASHINGTON, DC**  
1779 Massachusetts Ave., NW  
Suite 815  
Washington, D.C. 20036 USA  
Tel: (202) 588-9420  
Fax: (202) 588-9409  
info@asiafound-dc.org

**EAST TIMOR**  
Rua Jacinto Candido  
Audian, Dili  
East Timor  
Tel: (670) 331-3457  
Fax: (670) 332-4245  
general@taf.et.org

[www.asiafoundation.org](http://www.asiafoundation.org)